

四庫全書

史部

欽定四庫全書

史部
齊東卷三

詳校官編修_臣曹振鏞

檢討_臣德生覆勘

總校官檢討_臣何思鈞

校對官監本_臣張曾炳

謄錄監生_臣王思謩

欽定四庫全書

齊乘卷三

元 于欽 撰

郡邑

禹貢別州以山川定經界後世地理家宗之漢志主
于郡國凡山川事蹟附于州縣之內世史宗之齊乘
者地理之書也其於山川則法禹貢導之而未盡者
依史例亦附見于郡邑之下云

益都路 禹貢青徐兗州之域春秋戰國之齊及魯東

楚北之境秦齊郡琅邪之地漢初子肥王齊有七十
二城都于臨淄後置青州刺史領郡國有九北為齊
郡北海千乘及徐之琅邪東海郡地武帝封子閼為
齊王策曰嗚呼小子閼受茲青社蓋古者以太社五
色土隨方封國使立社故齊有青社之稱後漢魏晉
又為齊國樂安高密城陽郡地而青州刺史竝理臨
淄永嘉之亂刺史苟晞棄青州漢將曹窋據之以臨
淄平夷難以禦敵乃於堯山南築廣固城以居降于

東晉尋為石勒所陷後為段龕所據自稱齊王慕容
恪滅趙克青州苻堅并燕盡有齊地堅敗苻朗以州
降晉改置幽州以辟閭渾為刺史鎮廣固隆安四年
為慕容德所陷德都廣固稱南燕王子超為劉裕所
滅裕留羊穆之為刺史夷廣固城而歸穆之乃築東
陽城為青州宋置青州初理厯城後理東陽又移理
臨淄後併冀州琅邪皆沒於元魏魏置青州及北徐
州高齊因之宇文周并齊置齊郡樂安北海改北徐

為沂州隋竝廢之大業初復為北海高密琅邪三郡之地唐武德二年置青州總管府領州八此為青密沂三州屬河南道七年改為都督府天寶元年罷都督府改為北海郡乾元元年復為青州置平盧淄青節度石晉開運初為防禦州天福十二年復為平盧節度宋為青密濰沂四州屬京東東路淳化五年改青州為鎮海軍

按會要太宗命曹彬為青州節度使中書奏云唐乾元中侯希逸為平盧

節度本平州之地屢為賊所迫希逸率將士破賊又為奚虜所侵乃拔其軍二萬餘人且戰且行達青州

詔就加希逸為平盧淄青節度使自是迄今淄青節鎮皆帶平盧之名今青州頗為重地請以鎮海為額從之詔曰眷彼營丘控於東夏太公開四履之地小白舉九合之師忠烈猶存風流可尚宜改總戎之號用旌表海之邦青州
平盧軍改為鎮海軍開寶五年升密州為安化軍節

度元祐三年改安化為臨海軍政和元年以青州為齊郡金初屬偽齊後升為益都府太抵魏晉已前青州總治全齊為方牧之寄隋唐以降止同列郡故金太常卿范拱中和堂記云漢興田肯陳東秦形勝高祖納之大封同姓逮至有唐分天下為十道以青隸

河南止稱北海郡舉全齊之都會委之庶僚不擇重臣以為方伯此規畫之失也宋懲唐失升為帥藩總治八州由是益都復為重鎮然不升府號尚處濟南東平之下亦未為得也金於是始建府名立東路總管以十三州隸焉愚按此說非是漢祖初定天下三齊之地與關中懸隔千里非親子弟勿王懲信布也然封三庶孽分天下半亦足致亂漢初制度未必盡善唐之十道先儒謂遠不畔古近不違今其後禍亂

猶階藩鎮唐制豈短于宋乎國朝沿金制以東齊業
李全父子遂致跋扈擇重臣為方伯豈長策乎今益
都以東傅海皆割入寧海般陽南則益以滕嶧東西
不數百里南北僅千里焉此亦犬牙之勢也元領散
府一州十三縣三十六司候錄事司各四癸丑年廢
各州錄事司候入倚郭縣丁巳年行長山縣廢入高
苑縣至元二年割登萊二州八縣入般陽廢行淄州
淄川縣入益都縣行泰安州泰安縣入沂水縣蘭陵

縣入嶧州三年廢益都散府入本路昌樂縣入北海
縣九年割出寧海州及牟平文登二縣延祐三年增
置蒙陰縣今領州八錄事司一縣二十一隸府者六
隸州者十有五 東至即墨五百七十里西至般陽
路一百四十里南至邳州七百八十里北至濱州利
津縣二百一十里東南到淮安路海寧州六百四十
里東北到海二百一十里西南到濟寧路八百里西
北到河間路六百五十里到大都驛程一千三百五

十里徑九百里 府城五門周二十里俗稱南陽城
北城為東陽城東西長而南北狹兩城相對抱洋如
偃月因洋以為隍因其崖以為壁蓋古者合為一城
或皆羊穆之所築或後人增葺未可知也輿地記曰
北齊移益都縣入青州以城北門外為治所唐通典
曰今之青州理在益都縣歐陽公表海亭詩注曰南
洋北洋河一在州中一在城外曾肇南洋橋記曰東
陽城府治之北城也由此推之明是一城古昔全盛

之時初無棄地靖康兵燹之餘金人止據北城立府
後徙南城遂為瓦礫之區耳齊記補曰天會中北城
頽廢移州治南陽城為益都府愚按南陽酈道元通
為水名北齊嘗為龍興寺名其為城名不知所據天會
金太宗之年齊記補謂是章宗時臨淄李餘慶之筆
餘慶爵至開國編書如此則餘慶之文筆可知已或
云後人託名以
傳未必然也

錄事司 司府城內戶役初本路及沂密二州皆設錄
事司濰膠莒滕四州皆設司候司癸丑年並廢入倚

郭縣惟隨路置焉

益都縣

中

倚郭本漢侯國武帝封菑川王子胡為益

都侯故城在壽光縣南今縣境乃兩漢廣縣地屬齊
郡晉廢廣縣曹嶷築廣固羊穆之築東陽皆其地元
魏於壽光益城置益都縣高齊移入青州城北門外
為治所隋之北海郡唐宋之青州並理北宋以前止
為縣名金因升為府號仍置縣屬焉國朝因之至元
二年廢臨淄臨朐二縣并顏神鎮之行淄川縣入此

縣後復置臨淄臨朐二縣顏神鎮止設巡檢而來隸焉初以北門外為治所後移府城

臨淄縣

下

府北五十里古營丘齊都也晏子曰先君

太公築營之丘謂築邑此地漢初齊悼惠王都此後置齊郡後漢魏晉為齊國青州理此元魏為齊郡高齊廢入益都縣隋開皇十六年移高陽縣理此改為臨淄縣屬北海郡唐宋並屬青州金屬益都府國朝至元三年廢入益都縣十五年復置

元和志云縣理即臨淄古城然

則唐縣在古城今縣理小城
相去僅十里疑亦金亂所徙

臨朐縣

下

府南四十五里古伯氏駢邑縣北七里有

伯氏冢通典云古東陽城一名凡城左傳晏弱城東
陽者是也漢置臨朐縣屬齊郡以縣東朐山取名晉
省入昌國縣隋開皇六年改為逢山縣大業初改曰
臨朐屬北海郡唐宋並屬青州金屬益都府國朝至
元二年廢入益都縣十五年復置

高苑縣

下

府西北百六十里漢初封丙猜為高宛侯

後為縣屬千乘郡後漢晉屬樂安國高齊改曰長樂
隋開皇十八年改曰會城大業初復曰高苑屬齊郡
取高宛故城為名唐宋並屬淄州宋景德三年以縣
置宣化軍熙寧三年軍廢縣復來隸即縣置宣化軍
使金亦屬淄州國初屬行淄州至元二年行淄州廢
始來隸通典有漢被陽城又為狄縣地田儼兄弟殺
狄令起此安帝永初二年改狄為臨濟其後省入高
苑故城在縣南

樂安縣

下

府北九十里漢千乘郡樂安縣元帝封丞

相匡衡樂安侯後漢屬樂安國晉屬樂安郡隋省入
千乘縣開皇三年移於廣饒城屬青州今縣理也唐
武德二年於此置乘州八年廢之縣仍屬青州宋因
之金改曰樂安屬益都

壽光縣

下

府東北七十里應劭曰古斟灌國禹後也

古城在縣東
說見古迹

漢為壽光縣屬北海郡文帝十八年置

菑川國後漢併入北海菑川故城在縣西隋開皇六

年於縣北十里博昌故城置壽光縣唐初屬萊州後屬青州宋因之金屬益都

博興州

下

府西北百四十里古薄姑地東南有薄姑

城與漢博昌城相近十三州記云昌水其勢平博漢

置博昌縣屬樂安國高齊省之移樂陵縣理此

寰宇記樂

陵故城在縣東十二里

隋開皇十六年復為博昌屬北海唐屬

青州五代唐避李國昌諱改曰博興宋金因之歷代

止為縣國朝升為州

濰州

下

府東百三十里春秋戰國皆屬齊秦屬齊郡

漢平壽縣及下密桑犢地屬北海郡後漢省桑犢餘

屬北海國晉為濟南郡

輿地記曰晉濟南郡領平壽下密膠東即墨祝柯五縣而

以平壽為郡治考其屬邑乃漢北海平原膠東地非濟南地也

元魏復北海郡高齊

改高陽郡隋開皇十六年置濰州大業末年因賊陷

俱廢唐武德三年復置濰州領北海連水平壽華池

成都下密東陽寒亭濰水汶陽膠東營丘華苑昌安

都昌城平十七縣後六年唯存北海營丘下密三縣

餘並廢八年州與營丘下密二縣亦廢惟以北海縣屬青州宋建隆三年置北海軍乾德三年升為濰州政和元年又改為北海軍金復置濰州屬益都元領縣三昌樂廢領縣二曰北海曰昌邑以北海為治所北海縣下倚郭應劭曰古斟尋國禹後也漢為平壽

縣屬北海郡又有斟縣後漢屬北海國晉以平壽置濟南郡元魏後以為北海郡高齊改曰高陽隨初罷郡置下密縣於廢郡城開皇十六年於縣置濰州大

業末州廢移下密於此置北海縣唐武德二年以縣置濰州八年州廢省下密入北海屬青州宋初屬北海軍後屬濰州金因之國朝至元三年廢昌樂縣入焉按昌樂即漢之營陵縣廢城在縣西元魏時嘗曰營丘非臨淄之營丘也

昌邑縣

下

州東七十五里古鄆城左傳莊公元年齊

遷紀之鄆城漢志云在都昌西北漢都昌縣屬北海郡高祖六年封朱軫為都昌侯後漢屬北海國

古城在縣

南寰宇記曰都昌古城齊頃公封逢丑父食邑漢魏晉為縣後廢今為昌邑縣又云都昌漢更立昌邑縣魏晉因之按漢志武帝天漢四年更山陽為昌邑國楊震傳昌邑故城在兗州金鄉縣西北不應在此何故自相矛盾故俚俗因此誤隋曰昌都唐廢入北海以為昌邑令王審懷金之地

縣宋乾德間即唐安鄉建昌邑縣屬濰州

金皇統題名碑云

縣邑拒海五十里濰水之下流也韓信傳又曰臺昌漢末孔北海為黃巾賊管亥所圍太史慈約昭烈救之於此

密州

下

府東南二百八十里戰國齊地秦為琅邪郡

漢為琅邪高密城陽三郡地後漢屬琅邪北海國晉屬城陽郡元魏屬高密永安二年改置膠州隋開皇五年改為密州大業初州廢復為高密郡五代漢為防禦州宋因之開寶五年升安化軍節度元祐三年改臨海軍領縣五金割莒縣置莒州領縣四國朝以膠州高密二縣置膠州領縣二曰諸城曰安丘以諸城為治所

州理有中外二城外城漢東武城也其中城後魏築以置膠州隋改密州並理北城

諸城縣

下

倚郭左傳莊公廿九年城諸古城在縣西

漢為東武琅邪之郡治後漢屬琅邪國晉屬東莞郡
元魏屬高密郡隋開皇三年罷郡屬膠州五年改膠
州為密州縣仍屬焉十八年改東武為諸城縣大業
初復屬高密郡唐屬密州宋金皆因之

安丘縣

下

州西百二十里古根牟國漢高初封張說

為安丘侯後置縣有兩安丘一在北海一在琅邪後
漢止在北海曰古渠丘今縣鄰北海非琅邪之安丘
矣元魏屬東莞郡宋屬南平昌元魏屬膠州高齊天

保七年省隋開皇十六年分昌安縣於牟鄉城置牟
山縣牟鄉古根牟國也大業二年省昌安改牟山為
安丘縣三年移於漢平昌城唐武德六年移今理乾
元二年以安祿山亂改名輔唐五代梁開平二年復
為安丘後唐又名輔唐石晉避諱改曰膠西宋開寶
四年復曰安丘金因之並屬密州

膠州

下

府東三百五十里本漢琅邪郡黔陬高密不
其縣地後漢屬北海國晉屬城陽元魏置膠州於高

密郡隋開皇初改膠州為密州並理諸城十六年置
膠西縣屬高密郡唐武德元年省膠西入高密以其
地為板橋鎮宋元祐三年復置膠西縣移臨海軍理
此金亦為膠西縣屬密州國朝至元二十四年以縣
置膠州以高密即墨來隸

膠西縣

中

倚郭古介葛盧國左傳襄公廿四年齊崔
杼伐莒侵介根杜注云黔陬東北計基城號介國漢
文帝分齊立膠西國封悼惠子卬為膠西王都高密

此漢黔陬縣地晉屬城陽元魏屬高密後屬平昌郡
隋置膠西縣大業初省黔陬入焉唐省入高密以其
地為板橋鎮宋元祐三年復置屬密州又移臨海軍
理此金因之大德年間東嶽廟碑云臨海軍治膠西
為東武劇邑蓋控東南海道風颿信宿可至吳楚

高密縣

下

州西北五十里禹初封國春秋萊之夷維邑

也

即漢夷安城

漢文帝十六年置膠西國宣帝本始元年

更名高密光武封鄧禹為高密侯地屬北海宋孝武

併北海後屬高密高齊省之隋復置屬密州大業初
罷州復屬高密郡唐武德六年移高密治夷安城亦
屬密州宋金因之漢淳于縣本春秋之州國高齊省
入高密曹叅傳又為假密濰水所經信叅擊龍且地
即墨縣

下

州東北百二十里戰國田單所守城臨墨

水故名漢即墨縣屬膠東國後漢即墨國屬北海郡
晉屬濟北郡高齊省之隋開皇十六年於古不期城
東北二十里置今縣屬萊州

古即墨城在今
縣西朱毛城是

唐宋金

因之

莒州

下

府東南三百二十里本漢琅邪東莞東安地

晉改東安為沂水縣又為南青州宇文周改曰莒州
皆在沂水縣隋大業初廢之唐武德五年置莒州貞
觀八年廢以莒縣屬密州沂水屬沂州宋因之金升
莒縣為莒州屬益都府改日照鎮為縣併沂水來隸
國朝因之又析沂水置蒙陰領縣四曰莒曰沂水曰
日照曰蒙陰以莒為治

莒縣

下

倚郭古莒國地志曰周武王封少昊之裔茲

輿於莒始都計

膠州南
計斤城

春秋隱二年莒人入向向莒

縣也傳三十世至子朱號渠丘公為楚簡王所滅地

入于齊燕樂毅破齊惟聊莒即墨三城不下漢莒縣

屬城陽國文帝封朱虛侯章為城陽王都莒光武併

入琅邪魏城陽郡徙治東武莒仍屬焉晉太康十年

割莒縣屬東莞惠帝徙東莞郡理莒城南燕桓遵為

徐州刺史鎮莒劉裕北伐遵舉城降元魏亦以莒屬

東莞高齊罷東莞郡以莒東莞二縣屬東安隋開皇
初屬莒州大業初屬琅邪郡唐武德五年屬莒州貞
觀八年屬密州宋因之至今置莒州以縣屬

沂水縣

下

本春秋莒魯所爭之鄆邑十三州記曰魯

昭公所居為西鄆在東平莒魯所爭為東鄆在此杜
預亦云城陽姑幕縣南有員亭俗變其字即鄆也漢
為東莞縣即今縣城南燕於此置縣元魏孝文改為
新泰隋開皇四年改曰東安十六年於古蓋城別置

東安以此為沂水縣屬琅邪郡唐宋並屬沂州金屬
莒州國朝至元二年廢行新泰縣入此延祐三年復

析置蒙陰

州西北
七十里

日照縣

下

州東南百五十里海濱十里蓋漢海曲之

地宋元祐二年置日照鎮屬密州金升為縣屬莒州
南接淮安贛榆縣界有狝奎石駝山

蒙陰縣

下

州西北二百二十里蒙山北二十五里漢

屬泰山郡後漢省之晉復置屬琅邪高齊省入新泰

縣唐初置屬泰山後亦廢入新泰宋金因之國朝至
元二年廢行新泰縣延祐三年析沂水之新寨鎮置
此縣

沂州

下

府南五百里春秋齊魯二國之境秦漢琅邪

東海郡地初呂后封劉澤為琅邪王文帝徙澤王燕
以琅邪為郡領縣五十一後漢復為國封皇子京為
琅邪王自諸城徙都開陽故城是也晉武咸寧三年
改封東莞王伯王琅邪薨子覲嗣薨子睿嗣是為東

晉元帝即位于江東於琅邪郡城東北置發干戍以
南軍鎮之後為石勒所陷乃於丹陽江乘縣別立南
琅邪郡元魏莊帝置北徐州即今州理城也宇文周
改為沂州隋改為琅邪郡大業末為徐圓朗所據唐
武德四年平圓朗置沂州天寶元年復為琅邪郡宋
金並為沂州沂水經其東南淮泗舟楫通焉領縣二
曰臨沂曰費以臨沂為治所

臨沂縣

中

倚郭本魯地春秋城中丘在縣東北漢屬

東海郡後漢及晉屬琅邪國元魏改屬郯郡高齊省

隋開皇十六年置臨沂縣於古郯城

在今縣東二十六里

大業

二年移縣於州理唐屬沂州宋金因之

費縣

下

州西北九十里魯季氏之邑漢為縣屬東海

後漢為國屬泰山晉屬琅邪國自宋至隋並屬琅邪

郡大業末為賊所破唐武德四年重置屬沂州寰宇

記曰漢費縣理祊城元魏太和間自祊城移縣理陽

口山隋開皇三年復移入祊城今縣理是也

嶧州

下

府西南七百五十里古鄆國通志曰鄆亦作

繒姒姓子爵夏少康封其少子曲烈于鄆傳國至春

秋襄公五年莒滅之鄆太子巫仕魯去邑為曾曾皙

曾參其後也古鄆城在州東八十里此漢承縣地也

胡氏大紀曰莒女為鄆夫人取莒公子為後與黃歇進李園之妹於楚王呂不韋獻邯鄲之姬於秦公子

其事雖殊其欲滅人之祀而有其國則一也故書莒滅鄆

漢承縣屬東海郡

承時證切

晉惠帝分東海郡之蘭陵承戚合鄉昌慮五縣置蘭

陵郡理承縣隋開皇三年罷郡以承縣屬徐州十六

年以縣置鄆州大業二年省鄆州及承縣移蘭陵置
於廢鄆州城屬徐州後為山賊左君衡所破唐武德
四年復置鄆州又改蘭陵為承縣貞觀六年廢鄆州
以縣屬沂州宋因之
唐承縣仍理鄆州
城至宋移理今縣金改曰蘭陵
屬邳州國朝升嶧州初以蘭陵為倚郭縣至元二年
省

滕州

下

府西南八百里漢晉蕃

音皮

鄆二縣地屬魯國

唐宋則徐兗二州之縣金始置滕州屬東平府元領

縣三至元初割沛縣入濟寧路領縣二曰滕曰鄒以
滕為治所

滕縣

下

倚郭古滕國小邾左傳曰邾雍曹滕文之昭
也文王子錯叔繡所封三十二世為齊所滅漢初夏
侯嬰為滕令號滕公因秦縣也後置蕃縣屬魯國至
武帝移置公丘屬沛郡晉廢公丘入蕃還屬魯國又
置蕃郡高齊廢之隋以其為滕舊都故改蕃為滕縣
屬彭城唐屬徐州宋屬鄆州金以縣置滕州

鄒縣

下

州北百里古邾國通志云顯帝玄孫陸終氏

第五子晏安賜姓曹封于邾子孫以邾為姓周武王
封晏安之裔邾挾為附庸自挾至儀父十二世始見
春秋儀父附從齊桓定霸有功進爵稱子十四世邾
文公遷于繹改稱鄒趙臺卿曰至孟子時改曰鄒矣
改說非也按六書故邾鄒同聲之轉也春秋時邾邾
用夷故邾謂之邾婁婁有二音合閭音為邾合樓音
為鄒此本邾國耳後為楚宣王所滅遷之江夏故黃

州黃岡縣有邾城古鄒國則別見濟南北兩漢屬魯國晉廢南平陽入北縣屬魯郡隋因之唐屬兗州宋屬棗慶府金屬東平府

般陽府路 禹貢青州之域萊夷作牧之地周禮職方之幽州春秋戰國之齊秦屬齊郡漢晉則為濟南樂安東萊郡地元魏高齊為東清河郡及光州東牟之境隋屬齊郡及淄萊二州大業初淄州併入齊郡萊州為東萊郡唐武德元年置淄州四年置萊登二州

天寶元年廢淄州為淄川縣改萊州為東萊郡登州
為東牟郡並屬河南道宋置淄萊登三州屬京東東
路金屬益都國初淄州屬濟南登萊屬益都中統五
年置淄州路登萊二州來隸至元二年改為淄萊路
廿四年改為般陽府路元領縣六至元初割鄒平屬
濟南高苑屬益都二州帶入八縣今領州二領錄事
司一縣十二隸府者四隸州者八 東到益都路百
四十里西到濟南路二百二十里南到萊蕪縣百六

十里北到高苑縣百三十里東北到臨淄縣九十里
東南到沂水縣二百五十里西南到泰安州二百六
十里西北到青城縣百五十五里到大都驛程千二
百一十里

錄事司 沿革與益都路同

淄川縣

中

倚郭本漢般陽縣在般水之陽屬濟南郡

後漢屬齊國晉省之宋元嘉五年改貝丘縣於縣置
清河郡高齊廢郡以貝丘屬齊州隋開皇十六年以

縣置淄州十八年改貝丘為淄川縣大業初州廢縣屬齊州唐武德元年復置淄州縣屬焉又析置長白縣六年省宋金因之

長山縣

中

府北六十五里古於陵地

按史記索隱曰孟子云陳仲子

兄為齊卿仲子以為不義乃適楚居於陵楚王聘以為相仲子逃去為人灌園然則於陵又在楚地何也

漢置於陵縣屬濟南郡故城在縣南魏晉因之宋武於此僑立廣川郡改為武強縣高齊改廣川為平原郡隋開皇三年廢平原郡移武強縣入廢城屬冀州

十六年分置淄州縣仍屬焉十八年改武強為長山縣以縣南長白山名大業初廢淄州以縣隸齊州唐武德元年置鄒州縣又屬焉八年鄒州廢仍屬淄州宋金並因之

蒲臺縣

中

府東北二百里古有鬲氏國羿殺夏王相

其臣靡奔有鬲後與鬲君滅浞立少康漢千乘郡濕沃縣後漢為鬲侯國屬平原三齊記曰秦始皇東遊於臺下縈蒲繫馬今蒲生猶有縈者臺在濱州東去

此四十里名曰秦臺隋開皇十六年置蒲臺縣屬渤海唐屬淄州景龍元年屬棣州五代周世宗復屬濱州宋太中祥符五年省入渤海以其地為蒲臺鎮金復置縣屬濱州國初因之中統五年來隸

新城縣

中

府北八十里本長山縣之驛臺鎮國朝戊

子年以人民蕃聚置為縣以田索二鎮隸之

萊州

中

府東北五百里禹貢萊夷之地周職方幽州

之域史記周武王封太公於營丘萊侯聞之與太公

爭營丘則萊為殷時侯國也春秋時齊侯伐萊萊共

公浮柔奔棠晏弱圍棠滅之遷萊于郕

棠在即墨
郕在昌慮

秦

屬齊郡漢高四年以韓信虜齊王廣分齊置東萊郡

屬青州萊在齊之東垂也初理掖後理黃魏因之晉

武太康四年徙遼東王粲王東萊復理掖至宋改理

曲城元魏皇興四年分青州置光州

取界內
光水名

仍領東

萊郡州與郡同理在掖縣高齊宇文周並因之隋開

皇初罷郡改光州為萊州大業初復為東萊郡唐武

德初改為萊州天寶元年曰東萊郡乾元元年曰萊州隸河南道宋為防禦州屬京東東路金升州為定海軍節度屬山東東路國初屬益都中統五年來隸至元二年割即墨縣入膠州領縣四曰掖曰膠水曰招遠曰萊陽以掖為治所

掖縣

中

倚郭古過國

平聲

寒泥封子慕之地漢志夜侯

國有過鄉春秋類傳亦以有過在掖縣戰國策又云田單封掖邑即掖省文未知是否掖水出縣東南寒

同山故以氏焉自漢以來屬東萊唐宋並屬萊州

膠水縣

下

州南百三里本漢膠東國漢以即墨置膠

東國古城在縣南後漢省為縣屬北海國晉屬長廣
郡元魏屬北海郡隋仁壽元年改曰膠水屬萊州唐
宋金並因之

招遠縣

下

州東北百二十里本掖縣地有羅山金人

初置羅峯鎮後升招遠縣屬萊州西北至海五十里
海道東山河口至朱王海口倉百三十里

萊陽縣

下

州東北百八十里漢縣屬東萊郡在昌水

之陽故名古城在文登縣西南三十里晉初無此
縣元康八年復立昌陽縣屬長廣郡今理是也高齊
天保七年廢長廣以昌陽屬東萊郡隋開皇三年罷
郡以縣屬萊州唐因之五代唐莊宗避國諱改為萊
陽宋金因之

登州

下

府東北七百里北至海三里禹貢嵎夷

之地春秋牟子國戰國屬齊秦屬齊郡漢屬東萊郡

元魏屬東牟郡高齊屬長廣郡隋開皇初屬牟州大業三年廢唐武德四年復置牟州後因文登縣人不從賊黨遂於縣理置登州貞觀元年牟登二州俱廢如意元年又於牟平縣置登州神龍三年自牟平徙登州於蓬萊鎮析黃縣置蓬萊縣今州理是也天寶元年為東牟郡乾元元年復為登州宋因之屬京東東路領縣四金初析牟平文登兩縣置寧海軍以兩水鎮為福山縣楊疇鎮為棲霞縣還登州國初屬益

都中統五年來隸領縣四曰蓬萊曰黃曰福山曰棲霞以蓬萊為治所

蓬萊縣

下

倚郭本黃縣地漢武於此望海中蓬萊山因築城以為名唐貞觀八年於此置蓬萊鎮神龍三年析黃縣置蓬萊縣宋金因之

黃縣

下

州西南百三十里古萊子都此故城在縣東南二十五里漢黃縣屬東萊郡高齊天保七年移今理唐初屬牟州神龍三年屬登州宋金因之漢志秦

欲伐匈奴使天下飛芻輓粟起於黃腫

直瑞切

琅邪負

海之郡腫即文登黃即此縣

福山縣

下

州東南二百八十五里本漢腫縣地舊為

兩水鎮屬登州金偽齊阜昌二年置福山縣屬登州

棲霞縣

下

州南百五十四里腫縣地舊為楊疇鎮亦

偽齊所置

寧海州

下

禹貢碣夷周禮幽州域春秋萊國秦齊郡

之東腫漢東牟不夜縣地後漢為牟平侯國並屬東

萊郡魏晉止為縣高齊天統四年分置文登縣屬長
廣郡隋開皇三年改長廣為牟州以文登縣屬萊州
大業二年亦廢牟州入萊州唐武德四年又於黃縣
東中郎城置牟州文登縣置登州領文登觀音貫陽二
縣六年以觀陽屬牟州又置清陽廓定二縣屬登州
貞觀元年二州三縣俱廢入文登如意元年復登州
神龍三年登州徙置蓬萊鎮麟德二年復置牟平屬
登州宋因之金初偽齊劉豫以兩縣置寧海軍大定

廿二年升為州屬山東東路國初屬益都至元九年
直隸

省部領縣二曰牟平曰文登以牟平為治所 東到
海二百六十里西到福山縣七十五里南到汝山海
口百六十里北到營島海口十里東北到雙島海口
六十里東南到遠島海口百八十里西南到萊陽縣
二百四十里西北到清泉海口六十里到大都二千
三百里由海道千九百里

牟平縣

中

倚郭古牟子國

祝融後

漢牟平縣

在牟山陽其地坦夷

故曰牟平

屬東萊郡武帝元朔三年封齊孝王子濞

先列切

為牟平侯傳七世至莽篡國除故城在縣西北百里

高齊天保七年自牟故城移黃縣東北改屬長廣郡

隋開皇三年改長廣為牟州縣屬焉大業二年牟州

廢縣屬萊州唐武德四年又屬牟州貞觀二年廢入

文登麟德二年復置屬登州宋因之金屬寧海州

文登縣

下

州東百十五里本漢牟平不夜縣地高齊

天統四年分牟平置文登縣屬長廣以地有文山始
皇召集文人登之號曰文登隋開皇三年屬萊州唐
武德四年於縣置登州貞觀元年廢登州併廢清陽
廓定二縣入此縣神龍三年徙置登州於蓬萊鎮縣
仍屬焉宋因之金屬寧海州

濟南路

上

禹貢青西兗北之地齊履岱陰無棣之境
春秋戰國皆屬齊秦屬齊郡漢為濟南郡兼千乘平
原地文帝又分濟南國封齊悼王子勅侯辟光為濟

南王景帝二年國除後漢復為濟南國並屬青州魏

建安中分置樂陵郡晉為濟岷郡及樂陵國

輿地記曰晉濟

南郡領下密膠東即墨祝柯平壽五縣以平壽為郡
治考其屬邑乃漢北海平壽膠東地作濟南平地也
或云魏平蜀將徙其豪將家於濟河北改為濟岷郡
而太原地志無此郡名豈永嘉散亂簡編散落故失
其傳乎寰宇記乃永嘉末濟南郡自東平陵移理歷
城後為石勒所據非濟南屬邑當從輿地記改曰濟
岷

永嘉亂陷沒東晉義熙五年劉裕滅南燕復有其

地宋元嘉九年割青州西部於此僑立冀州元魏改
為齊州兼置濟南樂陵二郡隋開皇三廢郡復為齊

州十七年又於陽信縣置棣州大業初州廢又改為
齊郡唐武德元年復為齊州二年置總管府管齊鄒
東泰譚淄濟六州四年於厭次置棣州七年改總管
為都督府貞觀元年廢之七年復置督府管齊青淄
萊密五州天寶元年齊州改臨淄郡棣州改樂安郡
五載臨淄郡改濟南郡乾元元年復為齊州樂安郡
復為棣州並屬河南道五代周顯德三年又分棣置
濱州宋治平二年升齊州為興德軍節度政和六年

以齊州為英宗賜履之地升為濟南府金人初入中原知府劉豫以城叛降立豫為齊帝改元阜昌兼八州之地都于汴梁以子麟知濟南府八年廢之仍為散府按察置司焉國朝置濟南路總管府屬山東東路元領淄陵二州至元二年淄州自為淄萊路陵州并臨邑縣入河間路長清縣入泰安州禹城縣入曹州齊河縣入德州以濱棣二州及鄒平縣來隸今領州二錄事司一縣十一隸府者四隸州者七長官司一

東到般陽路二百二十里西到齊河縣五十里南
到泰安州百八十里北到無棣縣三百二十里東南
到萊蕪縣二百五十里東北到濱州海口四百七十
里西南到長清縣七十里西北到禹城縣百二十里
到大都千里

錄事司沿革同前

厯城縣

中

倚郭古齊厯下城在厯山之陰史記晉平

公伐齊戰于厯下酈食其說齊王廣罷厯下兵守韓

信襲破之皆其地自漢為厯城縣屬濟南郡晉屬濟
岷郡劉宋嘗於此僑立冀州隋開皇三年屬齊州大
業初屬齊郡唐武德三年屬齊州隋唐州郡並理東
平陵後改全節縣元和後省全節入厯城始為郡治
焉宋初屬興德軍政和六年屬濟南府金因之按述
征記厯城到營城三十里自城已東水瀰漫數十里
間南則迫山實為險固逮金亂土人因阻水立邑號
曰水寨歸附後始移置今縣

章丘縣

上

府東北百一十里本漢陽丘縣屬濟南郡

高齊天保七年以廢禹城縣西有古高唐城移置高唐縣於此即古黃巾城也隋開皇十八年以博州亦有高唐改此為章丘取縣南章丘為名爾雅上平曰章丘亦章亥葬女之山名女郎山者唐武德二年屬譚州貞觀元年屬齊州宋景德三年移縣北置清平軍以縣屬焉熙寧三年復移軍使於縣城金廢軍縣屬濟南

鄒平縣

上

府東北百八十里漢濟南郡有鄒縣

古鄒侯國

舜

有梁鄒後漢以鄒為鄒平屬濟南國晉省梁鄒入

鄒縣屬樂安國永嘉後鄒亦廢高齊天保七年移平

原縣置梁鄒城隋開皇三年移入鄒平城十八年復

為鄒平縣屬淄州大業三年屬齊州唐武德元年於

臨濟縣置鄒州以縣屬八年鄒州廢屬譚州貞觀元

年譚州廢屬淄州宋因之景德初徙治濟陽城金屬

淄州

濟陽縣

中

府東北九十里唐景龍元年折高宛置濟

陽縣屬淄州元和郡國志云濟水在縣南又南有八
會津水陸所湊其路有八故名八會縣廢城在淄州
北今縣本漢朝陽唐宋之臨邑章邱地金初劉豫割
章邱之標竿鎮及臨邑封圻之半置濟陽縣屬濟南
大定六年避金主允濟諱改曰清陽允濟遇殺復舊
名新市鎮舊屬臨邑至元二年併入濟陽撥戶千
二百四十六置長官司管投下差稅直隸濟南路

棣州

上

府東北二百四十里禹貢青兗之交周封齊

履之北境秦屬齊郡漢兼平原渤海千乘郡邑魏建
安中分為樂陵郡元魏又析樂陵為二隋開皇十年
以郡置厭次縣屬北海十七年以陽信縣置棣州大
業三年廢棣州自饒安縣徙滄州於信陽唐武德四
年析滄州之陽信滴河樂陵厭次置棣州八年又廢
入滄州貞觀十七年復於樂陵置棣州其後以樂陵
還滄州割淄州之蒲臺來隸徙州治厭次

故城在州
東北四十

餘里土人名
曰北舊城

天寶元年改為樂安郡屬河南道乾元

元年復為棣州五代梁刺史華溫琪以河水為患徙

州於厭次東南

州東南五十三里
土人名曰舊南城

宋建隆二年為團

練乾德三年升為防禦州大中祥符四年清河水溢

壞州城以厭次與陽信互易其地徙州治厭次金因

之國初濱棣自為一道中統元年置濱棣路安撫司

至元二年隸濟南路領縣四曰厭次曰陽信曰商河

曰無棣以厭次為治所

厭次縣

中

倚郭漢高祖初封爰類為厭次侯至文帝

國除明帝永平五年更富平為厭次縣屬平原郡相

傳秦始皇東游厭氣次舍於此故名魏晉屬樂陵元

魏時徙縣治馬嶺城

今陽信縣東馬嶺城是

高齊省之隋開皇

十三年復置於樂陵屬北海十七年屬滄州大業初

屬渤海郡唐武德四年屬棣州貞觀後徙州治此邑

五代梁徙州東南縣隨之宋大中祥符間與陽信縣

互易仍為州理

水經闕駟注曰厭次縣富平侯張安世封邑按本傳昭帝元鳳六年封安

世富平侯薨子延壽嗣國在陳留別邑在魏郡祖入
歲千餘萬延壽自以身無功德何能久堪先入大國
上書讓減戶邑天子以為有讓徙封平原并一國戶
口如故而稅減半然則陳留之富平乃安世始封平
原之富平延壽之徙封也漢功臣之世保國長久未
有若富平者豈非安世父子謙抑之所致可為後法
也

陽信縣

中

州東北四十五里本漢縣屬渤海郡高祖

初封呂青為陽信侯文帝復以封劉揭王莽省之後
漢延光元年復置魏晉皆屬樂陵元魏因之至高齊
廢隋開皇初後置屬滄州十七年屬棣州大業初又

屬滄州唐武德四年以縣置棣州六年州廢縣屬滄

州貞觀十七年還屬棣州宋因之大中祥符間與厭

次縣互因其地今因之

大統志晉東海王越斬汲桑於此按通鑑荀晞破汲桑桑

奔馬牧為人所殺故此不錄

商河縣

中

州西南九十里本漢平原初音力縣地武帝

封城陽王子讓為侯晉置漯沃縣

音它合反

隋開皇初於

漢初縣故城置滴河縣取縣南商河漢河隄都尉許

商疏鑿後入加水為滴以為名也初屬滄州後屬棣

州大業初屬渤海唐貞觀元年割屬德州十七年還屬棣州宋因之前此皆稱滴河至宋去偏傍為商河豈以紹聖間河決壞城大觀修復之後字從改耶然不可考矣金因之

無棣縣

下

齊履此境漢陽信地

陽信故城在縣東南三十里

隋開

皇六年置縣取縣南無棣溝為名唐貞觀初省入陽信八年復置屬滄州太和二年屬棣州尋屬滄州五代周顯德五年改為保順軍宋復為無棣縣屬滄州

金因之國朝割無棣縣半入滄州以縣領三鄉來屬而滄州亦有無棣故此又稱東無棣云

濱州

中

府東北三百五十里漢渤海郡地沿革同棣州五代之際置權鹽務於海濱因立贍國軍周顯德三年始割棣州之渤海蒲臺兩縣置濱州宋因之初省蒲臺入渤海慶厯六年又析置招安縣金復置蒲臺縣大定十三年於此立鹽使司後又析置利津縣改招安曰霑化國初濱棣自為一道中統三年置濱

棣路宣撫司中統五年割蒲臺縣入淄州至元二年
隸濟南路領縣三曰渤海曰利津曰霑化以渤海為
治所

渤海縣

中

倚郭唐垂拱四年析蒲臺置渤海縣天寶

五年以地斥鹵西徙四十里李丘村縣焉周顯德三
年以縣置濱州宋金並因之

利津縣

下

州東六十里本渤海縣之永利鎮金明昌

三年置為縣

霑化縣

下

州北六十里宋慶厯三年招撫海寇得安
即其地置招安縣熙寧六年省為鎮元豐二年復為
縣金明昌四年改曰霑化取龔遂為渤海太守海濱
之民復霑聖化立名

德州 禹貢兗州之域春秋戰國齊之北境秦屬齊郡
漢高祖分齊置平原郡後漢及魏晉以為宗王封國
元魏復為郡孝文太和中移郡於安德故城改為安
德郡隋開皇元年廢郡入冀州九年以郡置德州大

業三年州廢復為平原郡唐武德四年平竇建德復置德州又置總管府領博德棣觀四州七年改屬都督府貞觀二年廢督府割滄州之滴河厭次二縣來屬十七年二縣還屬棣州以廢觀州之蓨縣安陵來隸天寶元年改為平原郡十四年安祿山反平原太

守顏真卿據郡討賊

初明皇聞河北郡縣皆從賊歎曰二十四郡曾無一人義士耶

及真卿報至大喜曰朕不識顏真卿作何狀乃能如是欽按三代之後天下承平富庶莫如明皇始禍致亂毒流後代亦莫如明皇蓋其初政識姚宋晚年識李楊斯二人者天下皆識其心術明皇但識其形狀

故能敗亂天下至於真卿兄弟巡遠諸賢皆所不識而竭忠許國乃能如是自古識者不賢賢者不識信者不忠忠者不信豈特明皇而已哉此禍亂所以相尋也

乾元元年復為德州屬

河北道五代晉天福間移州理長河縣宋復還安德

展其城

景德三年刺史江日新展築

亦屬河北金屬山東東路國

初屬東平路至元五年直隸

省部仍割大名之清平濟南之齊河兩縣來隸領縣

五曰安德曰平原曰齊河曰清平曰德平以安德為

治所東到商河縣百八十里西到陵州七十里南

到高唐州百四十里北到吳橋縣七十里到大都八
百里東北到寧津縣百里東南到禹城縣百一十里
西南到恩州百一十里西北到景州二百里

安德縣

中

倚郭漢為縣後漢為國皆屬平原元魏以

縣置安德郡隋開皇初復為縣屬冀州九年於縣置
德州五代石晉徙州理長河以縣為屬邑宋嘉祐中
復為州理今因之

平原縣

中

州西南五十里漢平原郡平原縣有雋馬

河東北入海五百餘里

今枯河
猶存

韓信夜渡平原襲齊

歷下軍渡此河也高齊併鄒縣入此

古城在縣西光
武封馬武北邑

元魏置東青州尋廢屬安德郡隋開皇初郡廢屬冀
州九年改屬德州唐太和二年屬齊州尋復屬德州
宋金因之

齊河縣

中

本宋濟南之耿濟鎮漢耿弇討張步自朝

陽濟河即此地金劉豫家此鎮僭位後置為縣屬濟
南大定八年始城之國朝至元二年來隸

清平縣

中

州東百八十里本漢清河郡之清陽縣隋

開皇初徙貝丘縣置此十六年改曰清平屬博州大業二年屬貝州唐武德四年屬博州宋屬大名府舊邑在縣西四十里清平鎮元豐間漯河決壞城徙置博平縣之明靈寨今理是也金因之國朝至元二年來隸

德平縣

下

州東八十五里本漢平原郡平昌縣漢文

四年封齊悼王子卬為平昌侯元魏永熙二年移古

城隋開皇十三年屬滄州後還屬德州唐因之五代唐避諱改德平宋熙寧六年省為鎮元符二年復置屬德州金因之

齊邑外屬

高唐州之高唐縣 本漢平原郡地理志平原郡有高唐則漢縣也

曹州之禹城縣 濟南西五十里古祝國黃帝之後杜征南釋地曰濟南祝阿縣西北有轅城有高唐城春秋時齊邑漢祝阿縣屬平原郡隋屬齊州唐天寶元

年改曰禹城取縣南禹息古城為名安史之亂義營

防遏將軍李銑決河水以限賊縣為水壤乃徙八

十里移縣置遷善村為令理

故禹城在
豐齊之北

宋金並屬濟

南國初乙未年屬曹州

有阿陽城漢縣也在廢禹城
西北隋開皇初此城側得古

塚石銘云阿縣令李君墓龍額城亦漢縣在廢禹城
東南古高唐城在南五十里瑗城在南百里春秋晉
趙鞅代齊取犁及轅杜云犁一名隰轅即瑗也
原陽城唐縣亦在南百里廢禹城在南八十里

泰安州之長清縣 濟南西南七十里本盧地齊公子

僎食米於盧漢為縣屬泰山郡元魏孝昌二年自山

在故城移東太原郡置此後廢隋開皇五年置長清
鎮取清水為名十四年改為縣屬濟州唐貞觀十七
年屬齊州宋因之至道二年徙治刺榆店今縣理金
亦屬濟南國初乙未年屬泰安

東昌路之聊城縣 濟南西三百里齊西鄙之邑水經
注云鄒城縣東北三十里有故攝城左傳所謂聊攝
以東是也戰國時燕將保聊城田單攻之不下魯仲
連為書約之矢射城中燕將見書自殺兩漢屬東郡

魏晉屬平原因為郡治焉隋初屬博州大業中屬武陽郡唐宋並屬博州國朝屬東昌路倚郭按漢志千乘郡別有蓼城縣後漢為蓼侯國注云東北有攝城此古齊聊攝也今人皆以東昌之聊城當之故略具同異云 荏平縣聊城縣東北七十里左傳哀八年齊取闡杜注云漢東郡荏平縣北有闡鄉荏平至晉末圯於河後魏廢入聊城唐武德初以聊城之興利鎮復置貞觀八年又廢至今劉豫始復屬博州國初

撥屬東昌石勒賣為師謹奴耕田聞鼓鞞之聲縣西
南地名牛叢塊相傳是其舊耕之地李陽爭漚麻池
今有大李莊陽謹之裔猶存未知是否淳于髡墓在
縣西又唐馬周五代葛從周皆有墓土人名曰葛塊
東平路之東阿縣濟南西百二十里齊之柯邑春秋
莊公十三年會齊侯盟于柯曹沫劫盟於此漢為東
阿縣

兩漢有阿陽
無東阿記誤

魏封曹植地晉屬濟北國隋屬濟

北郡唐初屬濟州天寶十三載屬鄆州金宋並屬東

平

有阿井貢膠井
今在開河之西

陽穀縣東阿西南百里春秋僖

三年齊侯宋公江人黃人會於陽穀隋開皇十六年

始置陽穀縣屬濟北郡唐初屬濟州天寶十三載屬

鄆州宋開寶六年縣城圯于河太平興國四年徙置

上巡鎮金因之國朝屬東平阿井在縣東北金天眷

間重修有碑存今復廢縣東北安樂鎮相傳周世宗

養疾於此

河間路之臨邑縣

濟南北百里漢臨邑縣屬東郡宋

孝武孝建二年立東魏郡理臺城以臨邑縣屬焉隋

開皇三年罷郡屬齊州唐初屬譚州後屬齊州宋因

之建隆初以河決壞城徙治孫耿鎮此亦漢濟南著縣

平原隰陰縣地隰陰齊桓封公子廖之地漢為縣古

城近在縣西十里又名黎丘著城在縣東南五十里

古相傳地貢神著

按師古曰著音竹庶韋昭誤以為著龜之著失之遠矣後人緣此有

貢著之論

齊東縣舊趙巖口金為齊東鎮後在劉豫置


夾河巡檢司

以潁大清河故名夾河

金亂天兵南下城之壬子

年因置齊宋縣屬河間路癸丑年割屬濟南至元二年還屬河間

縣管寫戶郭外皆章丘鄒平地屬濟南故附見云



齊乘卷三

欽定四庫全書

史部
齊東卷四

詳校官編修_臣曹振鏞

檢討_臣德生覆勘

總校官檢討_臣何思鈞

校對官監丞_臣張曾炳

謄錄監生_臣王思誦

欽定四庫全書

齊乘卷四

元 于欽 撰

古蹟

類例有四各以類書近而相證者則聯書不拘以類
一曰城郭記古井邑二曰亭館該乎棟宇三曰丘隴
丘陵墳衍系焉四曰志聞碑銘詩說終焉凡此皆古
人之蹟也蹟於書者人存其政舉蹟於地者人亡其
跡亡過黍離而興悲臨廣武而有歎曠千載而相感

者其在茲歟

城郭

廣縣城 益都府南瀑水澗側漢廣縣故城元魏嘗以
置青州遺址猶存土人目為古青州

廣固城 府西北堯山下齊記云晉永嘉五年刺史曹
嶷所築有大澗甚廣因之為固故曰廣固初南燕慕容
德所築所都潘聰曰青齊沃壤號曰東秦地方二千
戶餘十萬四塞之固負海之饒可謂用武之國廣固

者曹嶷所營山川阻險為帝王之都德從之及劉裕
圍慕容超城側有五龍口險阻難攻兵力疲乏河間
人玄文說裕曰昔趙攻曹嶷望氣者謂澠水帶城未
易攻拔若塞五龍口城當自破石季龍塞之嶷果請
降後五日雷雨震開之慕容恪攻段龕亦塞五龍口
龕遂降今舊跡猶存宜試修塞裕從之超城中男女
皆患腳弱病者大半遂出奔為裕所擒此緣城閉日
久氣鬱不通自然生病自古兵革間多有之裕不學

故為玄文所誑耳其城為裕所平無復遺跡

臨淄古城 臨淄縣北雉堞猶存齊記補謂齊古城周

五十里高四丈十三門其西雍門韓娥鶯歌之地又

有稷門下立學舍所謂稷下學齊宣王聚文學游說

之士鄒衍淳于髡田駢騶奭接子慎到環淵之徒皆

賜列第為上大夫

縣北有大夫店由此取名

不治而議號稷下學

士荀卿嘗為稷下祭酒又鄭康成云齊田氏時學舍

所會號棘下棘稷音相近即稷下也亦城內地名左

傳陽虎叔公伐孟氏入自東門戰于棘下西南有申
門門外申池左太冲賦謂之照華池郡國志謂之左
右池即系水原也北曰章華門史記蘇代自燕入齊
見於章華門者是也城東北五里餘有雪宮遺址見
宇又西北系水之側有梧臺水經注楚使聘齊齊王
饗之梧宮臺臺甚層秀東西百步亦宋愚人得燕石
之處有漢熹平五年碑題云梧臺里又南歇馬臺土
人以為晏子作歌之臺或又以為簡公之檀臺皆不

可攷齊城在戰國時蘇秦謂城中七萬戶漢高又溺
愛外婦子以齊言者皆封之故齊地惟此城獨大意
其金盛之時車轂擊人肩摩連衽成帷舉袂成幕揮
汗成雨者信不誣矣

石槽城 臨淄東十里即古安平城因城內有石槽故
名魯莊公三年紀季以鄫入于齊杜注齊城東安平

縣有紀季墓

北有冢土人云蔽
無秦冢疑即季墓

田單封安平君即此

西安城 臨淄西三十里耿弇討張步謂西安小而堅

即此東有畫邑城王蠋鄉也弇進軍畫中居兩城之

間

路史云風俗通有齊大夫畫氏邑孟子宿畫畫在臨淄畫在西安今即畫水號宿留水畫乃畫之訛

不應有二

索頭城 臨淄東南二十里女水之南後魏慕容白曜

圍沈文秀於青州築此城因有索頭村

朱虛城 記云臨朐東六十里孔融為黃巾賊所敗曾

保此城蓋融保都昌與此相近又有東陽城亦曰九

城左氏曰晏弱城東陽又有校音效城武帝封城陽王

子雲為侯臨原城封菑川王子始昌為侯皆在臨朐
東見寰宇記

斟灌城 壽光東四十里寰宇記云斟灌城亦名東壽

光

自金為
斟灌店

按有窮后羿拒太康代夏政仲康子相位

依同姓諸侯斟灌斟尋氏羿相寒浞殺羿使其子澆
即羿也殺斟灌以伐斟尋滅夏后相后緡方娠逃出自

竇歸于有仍生少康焉杜征南謂壽光縣東南有灌
亭漢北海郡有斟縣應劭謂平壽為古斟尋東南有

斟亭京相璠曰斟尋去斟亭七里然則斟國在齊明矣皇甫謐乃謂斟灌在衛臣讚謂斟尋在河南引夏都為證顏監曰應氏止云斟尋本是禹後何預夏國之都乎瓚說非是

紀城 壽光南三十里春秋之紀國通志曰紀本在東海贛榆後遷劇亦稱紀城內有臺高九尺俗曰紀臺城旁有劇南城漢劇縣也爾雅云七達謂之劇驂北海劇縣有此路

王胡城 壽光北二十里古益都城也漢武元朔元年封菑川懿王子胡為益都侯薨子廣嗣廣薨子嘉嗣元鳳三年坐非廣子免

益城 壽光南十里漢益縣城寰宇記以為益都城云魏始于此立縣非是土人稱王子胡者正益都城耳豐城 壽光西二十里輿地記本漢菑川國城司馬懿伐公孫淵北徙豐人住此改曰南豐城

樂望城 壽光東二十里漢宣帝封膠東戴王子先為

樂望侯今曰王望店王望北十餘里又有古城土人名曰女直營金人屯兵之所

延鄉城 水經注千乘有延鄉城世謂之從城延從字相似野溝水出此西北入時水今樂安西北有此城漢元帝封李譚延鄉侯俗又云會城

千乘城 郡國志高宛縣北二十五里古千乘縣以齊景公有馬千駟畋于青丘得名縣北有青丘濼即今清水泊也又子虛賦注曰青丘山名出九尾狐在海

外蓋瀕海耳漢高置為郡和帝更名樂安國千乘縣並屬焉至隋開皇初移縣置廣饒此城遂廢其東復有漢利縣古城云

被陽縣 寰宇記高苑縣西南漢武封齊孝王子燕為被陽侯

廢濟陽城 唐景龍元年析高苑置在濟水之北尋廢故城在縣北九十餘里

薄姑城 元和志在博昌東北六十里即殷末薄姑氏

舊都今博興東北俗呼為嫌城者是又書序成王伐
奄遷奄君於薄姑奄在魯不知薄姑又是何地

博昌古城

博興南二十里漢博昌縣城

在金為博昌鎮

或亦

呼為薄姑城非是西對古城即延鄉也

利城 樂安西北二十里漢齊郡利縣

平壽城 濰州西南三十里漢縣古城又有廢下密城

在州西三里隋開皇中於北海縣置濰州移下密縣
於此大業二年併入北海此謂西下密東四十五里

有東下密隋開皇中分下密東界為膠東縣唐武德
初廢此城今在昌邑東南俗呼密城拒州不止四十
五里又東南有後魏皇興初所置膠東縣城州東南
三十里有漢桑犢城並見寰宇記白狼水出小王莊
正桑犢地

廢昌樂城 濰州西五十里古緣陵春秋淮夷病杞諸
侯城緣陵而遷杞齊侯與之車百乘甲一千此城東
南十餘里有營陵城又南安丘北海界上有起城營

陵即緣陵

見漢書注

起即杞耳在漢曰營陵縣元魏又曰

營丘

謂即太公所封者非是

唐初權置杞州後為縣宋改曰安

仁尋又改曰昌樂國朝至元三年廢入北海今廢城
內右玉華宮舊名神遊觀宋宗室淄王瑞華堂碑刻
在焉

訾城

昌邑縣西北海濱春秋齊師遷紀邢鄆杜注

北海都昌西有訾城則鄆地俗呼為瓦城半為水漸
城南有孫武廟

營城 昌邑南五里有大營城北五里有小營城南城
即古都昌不知何故謂之營城豈孔北海與黃巾相
拒屯兵遺跡邪

古諸城 密州西南三十里春秋時魯邑季孫行父城
諸及鄆

姑幕城 商侯國漢晉為縣郡國志引博物記曰城東
南五里有公冶長墓寰宇記則謂長墓在密州西北
五十里姑幕在莒縣東北百六十里詳此則姑幕城

當在密州

昌安城 安丘縣之外城漢石泉城後漢併入昌安在
縣西南十里寰宇記謂之安昌城今按張禹封安昌
侯乃汝南之縣又云西南十二里自安丘城實一城
耳記皆誤

平昌故城 安丘南六十里漢平昌縣屬琅邪亦為侯
國文帝封齊悼王子卬為平昌侯後徙封膠西王
郿城 安丘西南六十里春秋齊遷紀邢邵郿杜注朱

卷四
虛縣東南郢城漢為梧成縣後魏於此置平昌郡高
齊改為琅邪縣隋改曰郢城大業末廢

淳于城 安丘東北濰汶二水交處古有此城按通志

武王封禹後東樓公於杞

汴梁杞縣

九世成公遷于緣陵

濰州昌樂

至文公又遷居淳于號州公春秋州公淳于如

曹是也後為杞所并遷江南杞東樓之孫周亦封于
牟婁隱四年莒人伐杞取牟婁今諸城北有婁鄉安
丘南有牟婁山俗訛作朦朧山即其地

城陽城 安丘南八十里漢城陽國亦曰龍臺城城內有臺高六丈臺下有井與荆水通失物於井或於荆水得之有神龍出入其中故曰龍臺

鉞城 安丘南與郛城相近漢武封菑川靖王子成為鉞侯

計斤城 膠州南五里春秋之介根漢計斤縣語音有輕重耳莒子初都此後徙莒今有兩塔對立曰東西計斤

被城

音廢

膠州西南七十里漢被侯國屬琅邪俗曰肥

城廢音之轉也記謂被城無跡可考當在臨朐者非

是

黔陬城

高密縣西六十里兩城夾膠水而立縣道記

曰黔陬秦所置在高密郡東北古介葛盧國也後移

縣於膠水西相去三十里謂之東西二城高齊天祿

間廢介葛盧墓在東城側

龍且城

高密西南四十里濰水之東楚將龍且所築

水西即且冢冢南曰梁臺韓信囊沙壅水之地亦曰城陰城

夷安城 路史云夷安古維國有維水寰宇記謂今高密縣理東南外城即夷安城晏子萊之夷維人漢為縣屬高密國詳此則今縣理正古夷安城西北舊城乃宋縣耳

高陽城 高密西北三十里漢成帝封淮陽王孫並為侯一名膠陽亭大業末廢今有高陽村

稻城 高密西南濰水堰側土人呼堰為趙貞女防南
有高堤謂是彭岑冢皆謬此即稻城遺跡春秋稱琅
邪之稻自漢有塘堰蓄濰水以溉稻因名其城武帝
封齊孝王子定為稻侯郡國志亦謂之鄭城康成故
宅在此旁有稻田萬頃斷水造魚梁歲收億萬號萬
足梁今其遺跡鞠為榛莽矣

拒城 高密南三十里漢縣根艾水出北東入海今曰
拒城河

古膠西城 高密東南二十五里膠墨二水之間隋置
膠西縣在此大業末廢于賊土人呼為諸晏城以前
有晏子冢故也

不其城 即墨西南二十七里漢琅邪郡不其縣有太
乙仙人祠及明堂武帝所起寰宇記云古城約周十
餘里後漢改屬東萊晉於此置長廣郡高齊廢之隋
開皇十六年於此城東北二十七里置即墨縣今故
城在縣西南

臯虞城 即墨東五十里漢武帝封膠東康王子建為
侯以旁有王吉廟亦曰琅邪城又西有祝茲城漢初
徐厲及康王子延年皆封祝茲侯而兩漢無此縣蓋
是鄉聚之名取為國號耳公孫弘封平津霍光封博
陸之類是也

壯武城 地記即墨西六十里古夷國漢壯武縣屬膠
東國晉封張華為壯武侯今華廟在膠州西南即壯
武地

莒城 莒州治外郭周四十餘里內城周二十里子城

周十二里寰宇記曰縣理在故城城三重皆崇峻惟南開一門無知之難小白奔焉樂毅攻齊守嶮全國列女傳齊人杞梁殖襲莒戰死其妻哭于城下七日

而城崩

琴操一說殖死妻援琴悲歌曰樂莫樂兮新相知悲莫悲兮生別離哀哉皇天城為之崩

一說妻泣曰上則無父中則無夫下則無子人生之苦至矣乃放聲長號杞城為之頽遂投水而死其妹朝日悲之為作是歌皆後來追述後說近是

海曲城 莒州東百六十里地有東呂鄉太公望所出

後漢紀琅邪呂母結衆為子報仇殺縣長起此赤眉
皆其黨今有呂母固

曹公城 莒州南二十里魏武征陶謙所築今日五花
營

高鄉城 莒州東南七十餘里漢侯國宣帝封城陽惠
王子休為侯晉永嘉後城廢疑即今十字路城又有高廣

新山昆山皆漢侯國
並在州南無迹可攷

箕城 莒州東北百里箕屋山下濰水出此漢宣封城

陽荒王子文為侯

折泉城 漢侯國記附密州亦云失其所在然水經析
泉水出松山今曰分流山在馬耳山西城當屬此地
團城 沂水東北三十里城正圓因名團城隋開皇十
六年嘗於此置沂水縣後廢為鎮

蓋城 沂水西八十里蓋公先國陳仲子兄戴蓋祿萬
鍾即此漢為縣景帝封王皇后兄信為侯隋開皇中
於此城置東安縣後廢入沂水

向城 沂水西南春秋隱二年莒人入向通志云沂州有古向城寰宇記云夜頭水一名向水經漢裨城南入海向城在莒縣南蓋今沂州之向城鎮是也

郕城 沂州東三十六里左傳定公十年叔孫州仇帥師圍郕隋開皇十六年於此置臨沂縣大業二年移縣於今州理此城遂廢通志郕邑又在鄆州須城非是

即丘城 沂州南五十里路史云祝丘祝融氏之後臨

沂東南五十里即丘城是也桓五年城祝丘齊魯之音祝即相近漢為即丘縣至高齊廢今州西三十里乃漢厚丘城土人以為即丘州南即丘為新城皆誤

開陽城

今曰邾城

沂州北十五里古邾國祝融之後風姓

又云夏禹之後昭公十八年邾人入邾杜注謂琅邪開陽開本作啟叔孫州仇城啟陽是也漢避景帝諱改為開漢官儀曰洛陽城南東第一門始成夜有一柱止樓上開陽縣上言南門一柱飛去即洛城門柱

也光武建武四年封子京為琅邪王初都莒莒有城陽景王祠神數下言宮中多不利京上書願徙開陽肅宗許之今城側有京冢廟

郯城 沂州東南百廿里通志曰郯祈姓子爵或曰嬴姓少昊之後春秋時郯子朝魯能辨古官仲尼師之城內郯子宣聖共廟後漢志郯有勇士亭古勇士萬丘欽也

王僧辯城 沂州東北四十里梁將王僧辯所築土人

目為諸葛城不知所據又州城東北有小營城晉元帝之發于戍營也

鐘離城 沂州西南百餘里路史云鐘離徐之別封今沂之鐘離城乃晉吳會處其後徙九江吳滅之郡國志謂此城楚將鐘離昧所築按韓信傳昧家在伊盧東海臧胸有此邑城或於其鄉邑耳昧素與信善羽敗昧亡歸信信時為楚王及高祖偽遊雲夢信恐見禽或說信斬昧謁上必喜亡患昧曰漢所不取楚以

昧在公若捕我以自媚吾死公隨手亡矣乃罵信曰公
非長者卒自剄信持其首謁陳為高祖所擒先儒謂
李廣之不侯以斬灞陵尉欽亦謂信之不終以負鐘
離昧且樊於期以窮歸燕太子丹猶不忍負况昧楚
之忠臣已之良友以窮來歸乃始容而後負之可乎
以信之智獨不能如魯朱家為季布地乎信罪大矣
襄賁音肥城 鐘離城相對漢末劉虞初封容丘侯進封
襄賁侯虞郊人也故封鄉國俗訛作鑿城

古費城 費縣西北二十里古費伯國姬姓懿公之孫
後為季氏邑顓臾城在北所謂固而近於費

古武城 費西滕東兩縣之間子游絃歌舊邑

南成城 費縣南百餘里齊檀子所守漢侯國屬東海
因南成山而名漢末黃巾之亂鄭康成避難此山有
註經石室

祊城

本陽城

左傳隱公八年鄭伯請釋泰山之祀而祀

周公以泰山之祊易許田許在鄭地祊即此城寰宇

記云自漢費縣移理枋城後魏大和間自枋地移縣於陽口山隋開皇三年復自陽口移入枋城即今縣理也土人乃以陽口城為枋城又呼為許田城皆誤古承縣城 嶧州城西北小城寰宇記曰前承縣理今縣西一里漢承縣古城也晉已後蘭陵郡或理今州城或理鄆此城自為承縣宋始移焉

古鄆城 嶧州東八十里夏少康封少子曲烈于鄆傳國至春秋襄公六年莒滅之後屬楚漢晉並為緡縣

其後省入蘭陵隋初鄆州理承縣城大業二年始移
蘭陵郡理此後為山賊左君衡所據唐武德初平賊
復置鄆州理此城

鄉城 鄆城南邾夷父顏有功子周次子友父別封小
邾為魯附庸居于鄉樂史云鄉城在承縣土人曰小
灰城小邾之訛也

蘭陵城 州東南六十里古魯之次室邑列女傳魯次
室女倚柱而歎曰君老太子幼諸女笑之次室女曰

君老必愚太子幼必悖愚悖之間其亂必生竟如其
言次室邑後為楚地改曰蘭陵春申君封荀卿為蘭
陵令城南有荀卿墓城北有蕭望之墓欽按君老子
幼不得伊周之付託必亂然未亂而先見者少矣以
荀卿之智尚不鑑黃歇之敗次室女其賢乎

偃陽城

福音

州南五十里古妘姓之國祝融之孫陸終

第四子求言封於偃陽後為晉所滅後漢為傳陽縣
屬彭城

古薛城 滕州東南五十里薛任姓顓頊少子陽封於

任十二世孫奚仲為夏車正禹封為薛侯遷于邳至

孫仲虺為湯左相復居薛六十四世至愍侯洪為齊

所滅

奚仲廟在城中墓在城南

齊封靖郭君田嬰於此郡國志孟

嘗君時薛城中六萬家其城高厚無比以抗楚魏也

至今多英傑子弟蓋有文之遺風文父子墓並在焉

水經註云冢結石為郭作制嚴固瑩麗可尋今墓已

開發內如宮室以銅鐵鑄壁扣之有聲堅不可動

仲虺城

俗曰斗城

薛城西三十里晉太康地記曰奚正遷

于邳其後仲虺復居此潞水經城北西入于泗

滕城州西南十五里古滕國城秦縣之漢初夏侯嬰

初為滕令號滕公因秦舊孝武改為公丘故地志以

為公丘城

濫城州東南六十里左傳邾黑肱以濫來奔又名昌

慮城後漢建安中曾於此立昌慮縣有藍鄉即此邑

或又名戚城漢戚朐縣亦屬東海

古邾城 鄒縣南周武王封祝融安期之裔挾於邾為
魯附庸十二世至儀父始見春秋齊桓興霸儀父附
從進爵稱子又十四世至邾文公乃遷于繹繹本鄒
山故亦稱鄒此城蓋其始封之邑也漢嘗以為南平
陽

鄒城 嶧山南二里邾遷於繹依繹山以為邑漢志曰
城東門外有韋賢墓今此山前古城猶存石表大刻
曰漢丞相韋賢之墓此亦漢縣也

逢陵城 般陽府東北四十里逢伯陵商之諸侯封于齊薄姑氏代之後太公又代之逢蒙逢丑父皆其後或曰此即丑父之邑也

反蹤城 般陽北記謂齊景公失馬尋蹤遂得于此輿地記云魏明帝景初二年以遼東新沓民渡海來歸於此置新沓縣以居之

萊蕪城 般陽東南六十里齊靈公滅萊萊人播遷於此邑落荒蕪故稱萊蕪後漢范史雲為萊蕪長清儉

守節百姓歌之曰甌生塵范史雲釜生魚范萊蕪即

此邑城西有韶山出鐵代置鐵官

范史雲名丹

於陵城 長山縣南二十五里風俗通曰陳仲子齊世家辭爵灌園居於於陵史記謂於陵在楚路史謂於陵商世侯國在淄之長山者是余按仲子亦高潔矣孟子但譏其避兄離母或至敗倫亂俗後世亦曷常有斯人哉正足以勵衰俗耳

高苑故城 長山北二十里苑城店因此名

古濟南郡城 長山西北蓋漢濟南郡理也

曲成城 萊州東北六十里海邊漢曲成縣參山萬里沙皆在此晉改為曲城隋末廢唐武德四年復六年又廢

當利城 萊州西南四十里漢當利縣至高齊廢又有陽樂城在當利北陽石城即陵石侯國在當利南皆漢縣也見十三洲記

臨朐城 萊州北二十餘里漢縣顏監曰齊城已有臨

胸而東萊又有此縣各以所近為名縣道記城在海
水祠北約五六里去海二十里然今海廟宋初所建
去海才二三里與古不同矣

沙丘城 萊州北相傳商紂所築始皇崩處按史漢皆
云沙丘在鉅鹿縣北後人附會

挺城

徒鼎反

萊陽縣南七里漢挺縣屬膠東國

廢昌陽城 萊陽東南二十餘里隋大業間築唐永徽
初為水壞

長廣城 萊陽東五十里獮養澤在西漢縣屬琅邪後漢屬東萊高齊置長廣郡於中郎城後移郡於膠東此城遂廢此即中郎故城耳郡國志石勒遣中郎將石同築此以防海故名中郎城

古即墨城 膠水縣東南六十里正田單火牛城也漢膠東國領八縣理此俗曰朱毛城北數里有樂毅城毅圍即墨時所築

平度城 膠水縣西北六十里漢縣膠水經此城北入

海又盧鄉亦漢縣高齊併入膠東故城在平度南十餘里

鯨城 登州南十五里此亦有羽山相傳是魏將田預所築城近羽山取殛鯨為名

烏湖戍 登州北海中二百六十五里

大謝戍 北海中三十里二戍皆唐太宗征高麗所置後遂為鎮永徽始廢

故牟平城 州東南九十里漢縣城高齊天保七年移

縣置馬嶺山北遂廢

古萊子城 黃縣東南二十五里古萊子國都地名龍
門山峽之間鑿石通道極為險隘土人曰萊子關路
史謂即萊朱國

大入城 黃縣東北二十里司馬懿伐公孫淵築此城
以運軍儲

徐鄉城 漢縣蓋以徐福求仙為名成帝封膠東恭王
子炔為侯

士鄉城 鄭康成謂越有君子軍齊有士鄉城圖記皆云在黃縣按管仲制國為二十一鄉工商之鄉六士鄉十五豈一城邪

甌城 黃縣西南二十五里漢縣有百支萊王祠高齊天保間廢

睡城 音縋 寧海州東三十里秦漢負海縣後併入牟平

唐初置清陽縣後廢入文登城對之杲山臨清陽水故名清陽城清陽漢志作聲洋丹水所出東北入海

育犁城 寧海州西北八十里漢縣後漢省入牟平在
灝港水側其地良沃故名育犁

東牟城 寧海州文登縣西北十里漢縣高后封齊悼
王子興居為東牟侯

不夜城 文登東北八十里海濱漢志云古有日夜出
見於東萊萊子立此城有成山日祠雞鳴島解道虎
云不夜在陽庭城東南陽庭有青城山始皇射魚處
今按青城山即之罘山也因腫名清陽城之罘號青

城山陽庭即腫城是

東平陵城 濟南東七十五里春秋譚國齊桓滅之古

城在西南龍山鎮相對

史記齊世家作郕杜征南謂譚在濟南平陵郕乃東海郕

縣從春秋則當作譚以桓公奔莒過郕郕相近則當作郕

漢為東平陵縣右扶

風有平陵故此加東文帝封齊悼王子辟光為濟南

侯都此東晉時此城北石虎一夕移於城南有狼狐

千餘隨之迹皆成蹊趙王石虎遂起南寇之計歷代

皆為縣宇文周始廢隋亂土豪李蒲據城歸唐武德

二年置譚州平陵縣以蒲為總管貞觀中州縣相繼俱廢都督齊王祐反土人李君求房繼伯等據縣不從抗表以聞太宗嘉之敕曰齊州平陵百姓自隋末至今常懷忠誠不從寇亂宜加優獎以旌義烈縣依舊置改名全節其後廢入歷城北城漢為王都唐為州治故周二十餘里雉堞高峻三齊記以為殷帝乙之都按書序自契至湯八遷自湯至盤庚五遷並無都齊者况帝乙乃武乙之子紂之父也武乙帝乙皆

居朝歌逮紂而亡豈在此地城西北有陰地數畝天
色澄霽亦若雲陰迫視則無記謂青州有地鏡水影

蓋亦此類

平陵西北十五里有廢奉先縣城

鮑城 濟南東三十里鮑山下禹裔有鮑叔仕齊食采
於鮑因以為氏鮑叔生叔牙進管仲於齊桓其後世
為齊卿鮑城見三齊記山因城名遺山濟南行記作
咆山誤也

臺城 濟南東北十三里漢高初封戴野為臺侯又有

平臺城漢縣也在臺城北五十餘里俗曰故軍城

營平城 濟南東三十里漢縣宣帝封趙充國為營平侯隋唐皆置營城縣後廢入平陵餘見郡邑

巨合城 濟南東七十五里水經云巨合水南出雞山北經巨合城耿弇討張步進兵先脅巨里即此自宋為龍山鎮

祝柯城 濟南豐齊鎮東北二里周武王封黃帝之後于祝春秋祝柯齊邑漢為祝阿縣唐以縣南有廢禹

息城改曰禹城禹城移理遷善村此即祝城也西北

有野井亭郡國志云即齊侯唁公于野井

高唐城見亭館

陽丘城 章丘東南十里漢縣文帝封齊悼王子安為陽丘侯後漢省至高齊乃以黃巾城立章丘縣

甯戚城 章丘東北三十里水經註楊緒水經甯戚城亦漢孝武封魯恭王子恬為甯陵侯之邑

朝陽城 章丘北二十五里漢初封華寄為朝陽侯高齊廢入章丘隋復置改曰臨濟唐屬齊州宋咸平四

年復省入章丘以其地為臨濟鎮古城在鎮東

杜預云西

北有崔氏城丁公邑

樂安城

章丘臨濟鎮東北八十里地志以為漢千乘

郡後更為樂安國乃在高苑北蓋漢元帝封匡衡侯

國耳

亭山城

章丘西南六十里宋元嘉中於此置濟南縣

屬頓丘隋開皇初改曰亭山唐元和中省入章丘

管城

章丘臨濟鎮北記引晉太康志以管叔之後封

於此齊滅管故其子孫仕齊愚按書稱致辟管叔古
史謂管叔鮮罪大無後管夷吾出自周穆王至夷吾
始顯豈管叔之後邪鄭州管城乃管叔所封魯有管
邑大夫采地惟齊無管城北即漢之管城而傳寫致
誤

鄒平故城 鄒平西南二十里俗曰趙臺城唐武德初
置縣於此後移理今縣城遂廢

隋濟南城 鄒平東北十五里隋開皇中於此置濟南

縣大業初廢入長山

梁鄒城 鄒平東南三十五里漢梁鄒縣高齊天保間
自長山界內濟南故城移平遠縣於此城隋開皇初
自此移縣入鄒平

豐齊城 濟南豐齊鎮南漢荏縣唐天寶元年改為豐
齊元和十五年廢入長清地產半夏極佳

濟北城 長清縣西三十里

盧城 長清縣南五十里隱三年齊鄭盟于石門尋盧

之盟杜注云盧盟在春秋前莫知年代盧即齊地濟北盧縣故城是也

舊州城 北舊州城棣州南四十里唐棣州理北城五代梁刺史華溫琪以河水為害又南徙十餘里土人謂之南舊州城至宋大中祥符四年清河水復犯此城乃移州北置今理

富平城 陽信東南十餘里張安世子延壽徙封之邑亦名邵城西晉末邵續與段疋殲弟文鴛合兵攻石

勒屯此城元帝以續為平原守後為石季龍所破

陽信古城 本縣西南七里俗呼城子務

馬嶺城 陽信東十里後魏移厭次理此

大營城 濱州西二十五里金人屯兵所築故丁河口

金號鐵門關

權鹽務 州北門外五代之際所置遺跡尚存

鬲城 德州西北古有鬲國漢縣

鄒城

音輸

平原西南三十里漢縣屬清河後漢封馬武

為鄒侯即今夏津縣

重平城 德平西北三十里漢渤海重平縣後魏大明間亦置高齊廢入平昌

繹幕城 平原西北二十里漢縣屬清河高齊省入平原

般城 鈎般河得名郭璞曰水曲如鈎流盤桓也漢縣高齊廢後為水毀

厭次古城 德州東北二十里本漢富平縣明帝更名

厭次元魏時縣徙馬嶺此其古城

韓信營 平原縣相傳信渡平原襲齊營於此

亭館上

益都宣聖廟 府城西北隅有摹嶧山秦碑極精製旁刻云嶧山秦刻磨滅久矣宋初惟江南徐鉉有摹本贊皇李建中傳寫得之遺余曾祖金紫公傳子孫四世踰百年靖康建炎兵火相尋舊藏文籍散落殆盡獨此刻僅存命善工勒于青社郡舍阜昌甲寅河南

李仲坦志下刻云盜發文篋褫去皇帝立國惟初六
字不復敢補上下刻志五節不能備載石雖疊校鄒
嶧摹本有間矣有崇寧經史閣碑

州縣廟學不煩載
有古今石則書

龍興寺

府城西北隅修身坊宋碑云寺即田文宅蓋

本唐封演見聞記云青州南城佛寺舊傳孟嘗君宅
有二大鑊造食供客大者容四十石小者容三十石
李伍毀為兵器詳考圖志實非孟嘗君宅乃南史劉
善明宅耳碑陰金人刻曰宋元嘉二年但呼佛堂北

齊武平四年賜額南陽寺隋開皇元年改曰長樂又
曰道藏則天授二年改名大雲玄宗開元十八年
始號龍興今寺內有飯客鼓架寺東淘米澗南史劉
善明仕宋為北海太守元嘉中青州饑人相食善明
家有積粟自作饘粥開倉賑救鄉里皆獲全濟百姓
呼其家為續命田圖志相傳劉善明宅飯客鼓淘米
澗皆當時事宜善明亦嘗事佛故在宋止呼佛堂後
因捨以為寺且青州城晉羊穆之始築戰國時未有

此城田文何故宅於曠野蓋後人止慕其名謂能飯客者必斯人而隱沒善明之高義不得不辯寺有北齊八分碑制刻精妙碑陰大刻四字曰龍興之寺蓋唐人續刻者寺後天宮院古老栢院也有石刻布衣張在詩云南鄰北舍牡丹開年少尋芳去又回惟有君家老栢樹春風來似不曾來旁刻云青州教授畢仲愈元豐六年至洛謁太尉文公公曰昔范諷補之好論詩嘗曰青州富庶地宜牡丹春時遊樂之盛不

減洛陽古今人作詩者甚多而布衣張在一絕最為
可愛補之為余誦之誠有意思皇祐中余為青守大
書于西廡之壁今三十年矣子歸試往觀之仲愈還
至老栢院其壁已壞因題于天宮院之石柱俾匠者
刻之張生之詩既為四方所傳而詩之所自不可不
知也故具書公語而刻于左

城隍廟 龍興寺東耆舊相傳金正大間益都有潘府
尹者暮見城隍來謁曰公昔典漕枉殺二人今以相

付即有二鬼相隨驅之不去逾年尹死今上清宮潘
尹故宅也柱上猶有斫鬼刀痕事極可怪如近歲濟
南憲司有徐好古僉事由分司歸常鬱鬱不語一夕
家人熟寐好古忽起抽刀先殺其妻又殺其長子婢
媵死者數人惟幼子突窻間得逸徐乃自屠出腸而
死竟不知其故其居宅後棄為照磨廳事愚到官始
毀之而建架閣庫焉此事衆所目擊四方共聞潘尹
事亦不誣矣慮刑者可不戒哉 廟亦隨郡皆有亦

不煩載餘如東獄行祠府君三陵諸祠皆然

普照寺 府東北隅美政坊古名皇化寺偽齊劉豫改名普照相傳南燕主慕容行宮金大定碑刻存焉寺後東陽陵慕容德虛葬之冢近歲始為人所平

太虛宮 普照寺南初金季有全真道士丘長春自棲霞西入關過益都知府事徐君館之長春相其宅曰此福地也徐即施與之遂卜築焉井園不食使弟子誼茶投之即成甘泉

海岱樓 府城內其西宣慰司公署皆金統軍司衙也
金人有榮鎮中和二堂

范公亭 府西門外文正公知青州有惠政洋溪側出
醴泉公構亭泉上民感公德皆以范公目之燕談云
環泉古木蒙密塵迹不到去塵市數百步如在深山
中幽人逋客往往琴詩試茗於其間真如物外之遊
也最為營丘佳處歐陽文忠公劉貢父張禹功蘇唐
卿諸賢多賦詩刻石置亭中其後金人亦有醴泉碑

兵後俱亡

表海亭 府城北南洋橋北惟古臺存焉取左傳世昨
太公以表東海為名不知創於何代自歐陽文忠公
知青州已有詩近代任君謨詩有石刻兵後不存有
錄之者並載於後

富相亭 府南瀑水澗側富文忠公知青州所建歐公
游石子澗詩謂富相公創亭後人又建冰廉堂皆廢
微醉翁筆先賢遺跡殆將泯焉

武成王廟 府北舊城內有宋大中祥符元年真宗御
贊碑存焉

碑亭 舊城北世祖皇帝平李璿後賑卹青人民立聖
德碑翰林閣復子靜文

國王廟 舊城北王名穆呼哩招降李全有德於青人
故立廟

郭大夫廟 齊記補曰劉裕既平廣固城齊人郭大夫
相水土勸羊穆之築東陽城為青州後人為大夫立

廟于雲門山前或云益都城在山陰其雲門劈山皆始城者疏鑿以宣風氣審爾宣大夫所為乎府東五十里洱水東岸有郭朴墓碑土人以為即大夫之塋也

三元閣 舊府城內冠萊公典郡日所建今廢

羅漢洞 府西山中疑即齊記補所載七級禪寺

常將軍廟 臨朐穆陵關上齊記補曰將軍秦昭宣帝時為大峴戍主建元中戰歿後人立廟此山皆石為

之按通鑑晉孝武太元九年謝玄乘秦亂遣兵攻青州降之時符堅建元二十年也將軍蓋與玄戰死唐沈亞之沂水雜記又云沂水北一百里有將軍峴甚靈民置祠路左將軍曾為五郡牧姓常名玄通因築城失主將意斬之其屍數日不仆有臺曰立屍臺臺西南曰鞍山山北有闕曰穆陵闕李師古不臣作鎮于此元和初罷之南有沂山山有廟即東安公也沂州刺史每春月禱于是山山有谷九十九所河分八

大曰沂曰汶汶東注濰沂南流入清沂山東南有山
曰太平山頂平可八九十里頃歲有寇曾居之山北
十餘里有樹五壇此亞之記所說常將軍事跡與齊
記補不同而齊記補近是今兩存之五壇者劉裕伐
南燕兵過大峴而喜曰兵已過險士有必死之志餘
糧棲畝人無匱乏之憂彼已入吾掌中矣遂設祭天
五壇遺址尚存

冶官祠 臨朐南冶原酈道元曰熏冶水出西溪溪上

有冶官祠廣雅云金神謂之清明蓋古冶官故取稱
焉水色澄清特異中有古壇邃岸凌空疎木交合先
公太和中作鎮海岱余總角之年侍節東州此實栖
游勝地澠水燕談曰青之南有冶原昔歐冶子鑄劍
之地山竒水清旁無人烟叢城古木氣象幽絕富韓
公之鎮青也聞劉孟節先生累官不起欲隱此地乃
為築室泉上為詩以贈曰先生已歸隱山東人物空
古碑猶存而境物因人之勝則蕩然矣

阿育王塔

臨淄城西高僧傳石虎於臨漳修治舊塔

少承露盤佛圖澄曰臨淄阿育王塔地中有佛像承
露盤虎掘得之齊記補云唐太和中建寺五代無棣
僧道圓居之與宋太祖有舊加號蓋國大師增塔為
十二級祥符中更名廣化寺又載黃康弼詩云齊野
非吳渚支郎是子陵釣臺千古月寶塔萬年燈又臨
淄東南天齊淵側有石佛三尊各長丈有八尺不知
年代

古天齊觀 臨淄城內金大定間道士楊善淵卜此地
建三清觀掘得古碑志云大齊丙戌二年南郭石羊
巷楊道圓施花磚三千在天齊觀因知此地高齊時
天齊觀故基也今南郭石羊猶存

呂仙翁祠 博興城內祠即韓氏酒壚仙翁嘗飲于此
書屋壁云呂嵩獨酌洞濱宣和壬寅六月書凡十三
字後盜焚民居殆盡惟韓氏室完土人因名為辟火
符靖康間邑人乃於社稷壇碑陰模勒仙書立於祠

前社稷碑亦宣和間物圖志攷訂極為精妙可為後
法愚按仙翁游人間多稱回道如沈東老詩類是
也惟此顯書姓名賓字復加水豈以辟火而然邪州
北三十里居民張氏家亦有祠擣衣石上隱然飛劍
形影

錦秋亭 博興東南城上中統間邑人所建取坡詩命
名蓋齊地當時般灤衆水潴為馬車瀆以入海博興
宛在水中舟楫交通魚稻成市昔常過之愛其風水

絕類江南賦詩亭上云霜風收綠錦萬頃水雲秋海
氣朝成市山光晚對樓舟車通北闕圖畫入南州且
食鱸魚美吾盟在白鷗其鱸雖小亦四腮不減松江
有蓴菜齊人皆不識目鱸為𩚑魚云

孔北海祠 濰州公署後北城上宋政和四年太守安
陽韓公建又有論古堂亦韓所構今皆廢論古堂碑
略云學術如逢紛庸譚郎宗鄭康成甄宇徐房徐幹
孝友如淳于恭王裒王閭呂元簡節義如禽慶王修

杜公贊正直如羊融周澤王義是儀韓載操尚如公
沙穆邠原王昕隱德如逢萌管寧知人如郎顏高構
高義如孫嵩劉敏元政事如滕撫張允濟皆足以振
揚英聲扶持風教接邦人于道裒其像而繪之名其
堂曰論古掖縣簿劉杲卿文與祠堂碑金人修城記
三碑並立於城上州署扁曰靖恭亦有政和石記存
焉

玉清宮

濰州城北丘長春弟子尹清和建長春在漠

北還書誠清和曰勿化小末人出家蓋道非薄質可
受亦名言也書有石刻存焉

寒亭 濰州東二十五里夏諸侯寒伯明之國寒浞者
伯明之讒子也伯明棄之有窮后羿收之以為己相
浞遂殺羿因羿室生澆及豷使澆殺斟灌以伐斟尋
滅夏后相后緡逃歸有仍生少康焉有田一成有衆
一旅能布德兆謀以收夏衆卒滅寒浞復禹之績此
寒國也自古圖志皆載寒亭而俚俗之談極陋以齊

無志書故也

斟亭 通志云維州東南五十里古斟尋國漢北海郡亦有斟縣京相璠曰斟尋去斟亭七里杜征南云壽光縣東南亦有灌亭今按惟壽光之灌亭維州之寒亭在焉餘皆廢蓋古人圖志詳明故國廢城皆立亭以為表志後世蕩析不存為可惜也

信公祠 澠水燕談云蕭柳字大珍後梁宗室為青州刺史有惠愛篤信於民及死民為立祠千乘縣西謚

曰信公嘉祐中祠廢重修今有信家莊

蓋公堂 密州城內東坡建記以醫為喻意在介甫此
聞為勢家所奪碑記恐不存矣欽按曹參百戰餘勇
宜其剛銳自視無前及為齊相乃能賓師蓋公以清
靜化民稱為賢相後世武夫健將能若是乎此古人
所以不可及也

超然臺 密州北城上坡記曰城之北因城以為臺舊
矣稍葺而新之余弟子由適在濟南聞而賦之且名

其臺曰超然石刻具存

城陽景王廟 莒州城內祀漢朱虛侯劉章章齊悼惠
王子誅呂有功文帝封為城陽王漢時惟高廟有神
靈王莽畏而毀之城陽廟亦靈異琅邪王京遷都避
去赤眉軍中猶鼓舞之蓋其英烈之氣有乃祖之風
廟久廢州署內有古槐半體如枯槎而根葉敷茂相
傳是章手植益都舊城北南陽水上古亦有廟遺址
尚存

馬嶧山神祠 莒州南馬嶧山宋政和四年敕額惠感

廟

夷吾亭 蒙陰西北堂阜鮑叔解管仲縛於此今名憚
阜音轉也

庸生廟 膠州城西門外冢在廟旁而地記又云庸生
宅在掖縣非是

石臼島龍祠 膠州海邊宋紹興三十一年封右順侯
賜威濟廟後金主南侵遣舟師由海道趨兩浙宋將

李寶遇於膠西海口禱于神祠得風助順遂殪金師
故加封

靜治堂 沂州公署後堂宋人建有元祐六年新剏蓮
花漏碑云刻漏之法莫如燕公潼川之制訪求得之
於營丘之白門蓋歐陽文忠公因燕公之舊而新之
者又參取翰林蘇公子瞻所為彭門記者而制焉靜
治堂後舊有香林館思賢堂雨聲軒三休亭平野亭
惟靜治平野三休在焉至元初碑云宋時郡治堂宇

壯麗者舊猶能道之兵後焚毀無遺僅存而可致者
惟金防禦使鄭景純一碑而已景純有南柯子十愛
詞石刻王黃華兩聲軒碑亦存

普照寺 沂州城西金皇統四年仲汝尚碑云當子城
西南有古臺臺西有廢池耆舊相傳臺曰曬書池曰
澤筆東晉王右軍故宅也往歲得斷碑于土中謂招
提復興于後魏唐賜額開元宋崇寧初詔改為天寧
萬壽禪寺逮廢齊居攝專用苛政理國知衆不附尤

狹中多忌凡浮屠老子之居一切廢革遂易天寧為
普照云按寰宇記此名永嘉臺琅邪王睿所築與此
不同記又云沂州東北三十八里故臨沂城南有王
導故宅亦無跡可攷

柳毅廟 沂州艾山宋元豐二年封靈鎮侯政和五年
賜額昭應

酺神廟 艾山東厚丘城側周禮族長祭酺酺災害神
主生蜚螽故祭之因合衆飲酒後世遂有酺賜

蒼山廟 沂州南蒼山宋元豐三年封豐德侯政和六年賜額靈豐

昭濟王廟 費縣蒙山神宗熙寧八年賜額靈顯廟封潛應侯元祐七年進封公大觀二年封昭濟王政和五年封昭濟惠民王

顏魯公祠 費縣東門外宋職方員外郎曹輔碑云公有廟在費東五十里諸滿村元祐六年楊元永為邑建新廟于此定海主簿秘書省校對黃本書籍秦觀

書丹碑陰復刻米芾書云公之使賊也謂餞者曰吾昔江南遇道士陶八八得刀圭碧霞餌之自此不衰嘗云七十後有大厄當會我于羅浮山此行幾是後公死于賊歸葬偃師北山有賈人至羅浮山觀道士奕託書至偃師北小顏家及往訪之則塋地守冢蒼頭識公書大驚家人卜日開壙棺已空矣元祐二年九月余游吳興適覩邦人新公之祠因得謁拜公像嘗閱洛中紀異載公前事刻于碑陰以貽續仙傳者

云又王仁裕玉堂閒話載公遭難後十餘年家僕於洛京見公衣白衫張蓋歸城隅萊園有破屋數間僕隨入拜之公出懷中金十兩以寄其家戒僕勿與人言公之子亟至但見滿目榛蕪而已時人皆云魯公尸解得道然此或即一事而記有異同公英烈之氣在天地間非仙即神則無足疑者

二疏宅 嶧州東四十里羅滕城墓亦在焉城周五六里土人指以為宅按二疏歸鄉里顧有舊田盧娛樂

終身不為子孫增益產業寧有如是之宅乎即城內古寺其故基也海州有景疏樓

絃歌堂 滕州公署後子游之武城近在州東故取名

宋人有鄒堂以山谷鄒搢取
名又有公堂見坡記今並廢

性善書院 滕州城內

伏羲廟 滕州染山愚按潁史風姓實司太皞之祀鄒魯有廟是也伏羲都陳謂州東鳧山有墓則非也

陶朱公廟 滕州陶山按陶本作桃即古之華萊山也

後人因陶之訛遂以祠陶朱

趙盾祠 滕州高山唐元和志盾祠在絳州太平縣宋

會要在府州府谷縣皆晉地今此有祠何也且宣子

固晉之賢大夫董狐以其亡不出境還不討賊為法

受惡書曰弑君孔子韙之所以戒萬世亂臣賊子之

黨也後世乃廟而祀之賊黨何所懼乎盾祠當毀

又案


宇記長青縣東北有盾墓亦後人附會自宋有天下譜系趙狐祠墓之衍蓋由此也

子思書院 鄒縣城內

鄒國公廟 鄒縣城內地名因利溝謂即孟子故宅宋
元豐五年封政和五年詔孟子廟以樂正子配享公
孫丑以下從祀其封爵樂正子克利國侯公孫丑壽
光伯萬章博興伯浩生不害東阿伯孟仲子新泰伯
陳臻萊伯充虞路樂昌伯屋廬連奉符伯徐辟仙源
伯陳代沂水伯彭更雷澤伯公都子平陰伯咸丘蒙
須城伯高子泗水伯桃應膠水伯盆成括萊陽伯季
孫豐城伯子叔承陽伯

靈貺廟 鄒縣嶧山神祠宋大中祥符元年封靈岩侯

崇寧四年賜額



齊乘卷四